



21. august 2009

UKA 2009/44

Inatsisartut suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiuppara:

**Naalakkersuisut utoqqalinersiat pillugit Inatsisartut peqqussutaata nr. 3-p 7. maj 2007-imeersup allanngortinnissaa siunertaralugu siunnersuummik saqqummiussaqaqqullugit peqquneqarnissaannik aalajangiiffigisassatut siunnersuut, aapparisaq imaluunniit inooqatigisap toqukkut qimagunneratigut utoqqalinersiaasa qaammatini marlunni tulliuuttuni aapparisaq qimataasumut tunniunneqartalernissaat siunertaralugu.**  
(Inatsisartunut ilaasortaq Debora Kleist, Inuit Ataqatigiit)

### **Tungavilersuut:**

Aappariit ukiorpassuarni aappariissimallutik aappaasoq toqukkut qimagukkaangat qimataasoq annertuumik misigissutsikkut eqqorneqartarpoq. Tassami aamma toqusoqarsimatillugu qaammatip tullianiit allannguut pisarmat. Maqaasinerup saniatigut ulluinnarni aningaasatigut ikioqatigiilluni akilersugassatut naatsorsuussat tassanngaannartumik allanngoriataartarput.

Aliasunnerup saniatigut aamma aningaasatigut atukkat tassanngaannaq allanngornerisigut ernumagisat nanertuutinningsinnaapput. Tamannalu ingalassimaniarlugu matumuuna siunnersuutigaara, utoqqalinersiallit aappaasup qimagunneratigut qaammatini marlunni aapparisaq utoqqalinersiutai pigiinnartassagaat, taamaasilluni piffissaqarnerulaarluni kisimiittutut aningaasatigut imminut pilersulernissaq piareersarfigisinnaaqqullugu.

Taamaattumik aalajangiiffigisassatut siunnersuutigaara Naalakkersuisut utoqqalinersiat pillugit Inatsisartut peqqussutaata nr. 3-p 7. maj 2007-imeersup allanngortinnissaa siunertaralugu siunnersuummik saqqummiussaqaqqullugit, aapparisaq imaluunniit inooqatigisap toqukkut qimagunneratigut utoqqalinersiaasa qaammatini marlunni tulliuuttuni aapparisaq qimataasumut tunniunneqartalernissaat siunertaralugu.